

Innuttaasut peqqinnissaqarfillu akunnerminni tatigeqatigiinnerat ataqpeqatigiinnerallu annertusarnissaa anguniarlugu atorfillit atuisullu oqaloqatigiinnerat annertusarnissaa anguniarlugu peqqinnissaqarfinni immikkoortortaqaqarfinnilu tamani atuisut siunnersuisooqatigiivinik pilersitsinissamut periarfissat misissornissai pillugit Naalackersuisut peqquneqarnissaanik Inatsisartut aalajangiiffigisassaattut siunnersuut. misissuineq aningaasatigut kingunissaanik nassuiaassaaq UKA2023-lu nallertinnagu tunioraanneqassalluni

(Inatsisartunut Ilaasortaq Anna Wangenheim, Demokraatit)
pillugu

Ilaqutariinnermut Peqqissutsimullu Ataatsimiititaliap

siunnersuutit aappassaaneerpeqarnerannut

ISUMALIUTISSIISSUTAA

Ataatsimiititaliap suliarinninnermini uku ilaasortarai:

Inatsisartunut ilaasortaq Anna Wangenheim, Demokraatit, siulittaasuugallartoq

Inatsisartunut ilaasortaq Hans Peter Poulsen, Siumut

Inatsisartunut ilaasortaq Mikivsus Thomassen, Inuit Ataqatigiit

Inatsisartunut ilaasortaq Eqaluk Høegh, Inuit Ataqatigiit

Inatsisartunut ilaasortaq Dines Mikaelson, Siumut

Inatsisartunut ilaasortaq Najaaraq Møller, Siumut, sinniisussaq

Inatsisartunut ilaasortaq Paneeraq Olsen, Naleraq, sinniisussaq

UKA 2022-imi oktoberip 20-iani siullermeerinerup kingorna siunnersuut ataatsimiititaliap misissorpaa.

1. Siunnersuutip imarisaa siunertaalu

Peqqinnissaqarfinni immikkoortortaqaqarfinnilu tamani atuisut siunnersuisooqatigiivinik pilersitsinissamut periarfissat qulaajarnissamut misissuisoqarnissaa pillugu Naalackersuisut peqquneqarnissaannik siunnersuummi matumani siunertarineqarpoq. Matumani sumiiffinni ataasiakkaani ajornartorsiutit sukumiisumik ataatsimullu isigaluni aaqqiivigiumallugit peqqinnissaqarfiup innuttaasullu akornanni attaveqartarnerup annertusarneqarnissaa naammassineqarsinnaaqullugu. Suliaq una 2023-imi upernaakkut ataatsimiittoqannginnerani Inatsisartunut agguanneqassaaq.

2. Siunnersuutip Inatsisartunit siullermeerneqarnera

Innuttaasut peqqinnissaqarfiullu akornanni attaveqartarnerup pitsaanerulernissaanut sulisoqarnissaa siunnersuummik matuminnga siullermeerinninnermi tapersorsorluarneqarpoq. Taamatutaaq peqqinnissaqarfiup sullissinerata pitsaassusaa qaffasissuunissaa kissaatigineqarluni oqaatigineqarpoq.

Naalackersuisut imaattumik allannguutissatut siunnersuummik saqqummiussaqarput:

”Peqqinnissaqarfimmu saaffiginninnissamut periarfissaareersut pillugit ilisimasat siammarterneqarnissaasa suliaassutiguarnissaannut suliniutaareersunullu annerusumik innuttaasunik peqataatitsinissaq pillugu Naalackersuisut peqquneqarnissaanik Inatsisartut aalajangiiffigisassaattut siunnersuut.”

3. Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassat siunnersuutip piviusunngortinneqarnissaanut aningaasaqarnikkut allaffissornikkullu kingunerisassat siunnersuummi allaaserineqassasut.

Siunnersuutip piviusunngortinneqarnerani aningaasatigut kingunerisassai siunnersuummut matumunnga naapertuuttut ataatsimiititaliap maluginiarpa, taamaalilluni aningaasartuutit 250.000 kr.-t 500.000 kr.-illu akornanni amerlassuseqassallutik.

4. Ataatsimiititaliap siunnersuutiniq suliarinninnera

§ 37 naapertorlugu akissuteqaat ataatsimiititaliap innersuussutigaa¹. Atuisut siunnersuisooqatigiiviniq pilersitsinissamut aningaasatigut kingunerisassat ersarissisinneqarsimangitsut siunnersuuteqartumut akissuteqaammi ersarittoq ataatsimiititaliaq isumaqarpoq. Taamatutaaq atuisut siunnersuisooqatigiivi qanoq katitigaanissaat aqunneqarnissaallu qulaajarneqartariaqarpoq.

Siunnersuummik matuminnga suliarinninnermi misiligutigalugu misissuineq Naalackersuisut ilannguppaat “Kalaallit Nunaanni peqqinnissaqarfik atuisut isaannit isigalugu”. Tassunga atatillugu immikkoortoq “Kalaallit Nunaanni issittumilu nunani allani innuttaasut akisussaaffeqartut” ataatsimiititaliamit maluginiarneqarpoq. Tassani arlalinnik assersuuteqarluni naggueqatitta qanoq innuttaasunut assigiinngitsutigut akuutitsisarsimani allaaserineqarsimapput. Ataatsimiititaliap paasinninnera naapertorlugu ”Community of practice”-mik taaneqartartoq aqqutigalugu atuisut siunnersuisooqatigiiviniq misissuinissamut suliaqarnermi isumassarsiorfiusinnaavoq. Siunnersuisartut taamaattut innuttaasut

¹ § 37 naapertorlugu apequteqaat, nr. 154, 8. august, 2022-imi akineqartoq

akuutinneqarnerunissaat tapersersugarigaat ilutigisaanillu inuiaqatigiit kulturiat, ulluinnaat naleqatitaallu aallaavigisaraat ataatsimiititaliamit maluginiarneqarpoq.

Allannguutissatut siunnersuutip piviusunngortinneqarnissaanut aningaasatigut allaffissornikkullu kingunerisassai Naalakkersuisut allannguutissatut siunnersuutaanni allaaserineqarsimangillat, allannguutissatulli siunnersuummi suliniutit aallartinneqareersuni ilaareersut ataatsimiititaliamit nalilerneqarpoq. Tamatuma Peqqinnissamut Naalakkersuisoqarfimmut aningaasaliissutissatut aalajangiunneqareersuni akilerneqarnissaa naatsorsuutigineqartoq ataatsimiititaliamit oqaatigineqassaaq.

Ataatsimiititaliap suliarinninnerminut atatillugu allakkatigut apeqqutinik arlalinnik ataatsimiititaliaq Naalakkersuisunut nassiussaqqarpoq. Isumaliutissiissummi ilanngussatut kakkiunneqarput. Naalakkersuisut akissuteqaataat aallaavigalugu innuttaasut peqqinnissaqqarfimmik attaveqarnissaminut periarfissaat pillugit ilitsersuutinik paasissutissanillu innuttaasut pisariaqartitaannik naammassinnikkumallutik paasisitsiniaanermik Naalakkersuisut aallartitsisimasut ataatsimiititaliamit maluginiarneqarpoq. Tamatuma saniatigut Naalakkersuisut oqaatigaat, siunnersuutip itigartinneqarneranut tunngaviusoq tassaasoq, allaffissornikkut suliakkersuinerminngarnit peqqinnissakkut kiffartuussinernut sullissinernullu nukiit sulisunit atorneqartarnissaat Naalakkersuisunit oqaatigineqarpoq. Ilanngullugu Naalakkersuisut oqaatigaat, "siunnersuisooqatigiit" ataatsimik aaliangersimasumik ilusilersorneqarsinnaanngitsut, peqqissutsimulli sulisorisat najukkani aaqqiissutissanik najukkani ataasiakkaani atorneqarsinnaasunik ilusilersueqataasinnaammata.


5. Ataatsimiititaliap inassuteqaatai

- Ataatsimiititaliaq isumaqatigiittoq imaattumik allannguutissatut siunnersuummik saqqummiussaqqarpoq:


"Oqaloqatigiinnerunissap innuttaasunillu peqataatitsinerunissaq aammalu peqqinnissaqqarfiup atuisullu akornanni nunalu tamakkerlugu sumiiffinni peqqinnissakkut suliaqartunut tatiginninnerup ataqqinninnerullu siuarsarneqarnissaanut periarfissanik misissueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermit inernerit UKA2023-imi agguanneqassapput".

- Ataatsimiititaliap isumaqatigiittup allannguutissatut siunnersuutip akuerineqarnissaa inassutigaa

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.



Hans Peter Poulsen



Anna Wangenheim
Siulittaasup tullia



Mikivsuk Thomassen




Dines Mikaelen



Eqaluk Høegh



Najaaraq Møller



Paneeraq Olsen



Ilaqutariinnermut Peqqissutsimullu Ataatsimiititaliaq
inlun@ina.alla.gl

**Peqqinnissaqarfimmi atuisut siunnersuisooqatigiivi pillugit, oqal. 85,
Ilaqutariinnermut Peqqissutsimullu ataatsimiititaliap apeqquaqataanut
akissuteqaat**

10-11-2022
Suliap normua 2022 - 23130
All. nr. 21722838

Ilaqutariinnermut Peqqissutsimullu Ataatsimiititaliap apeqquaqataanut qujanaq.
Apeqqutit tullinnguuttuni uteqqinneqarput akineqarlutillu.

Postboks 1160
Oqarasuaat: 34 50 00
Fax: 34 55 05
3900 Nuuk
Email: pn@nanog.gl
www.naalakkersuisut.gl

- Naalakkersuisut allannguutissatut siunnersuutaat siunnersuutaqaartumut itigartitsissutitut isikkoqarpoq, innuttaasut peqqinnissaqarfiullu akornanni tatigeqatigiinnerup qanoq annertusarneqarnissaanut piviusorsioortumik naatsorsuisoqarsimananiilu siunnersuuteqartoqarsimanngimmat. Taamaattumik atuisut akuutinneqarnissaannut tunngatillugu ullumikkut suliniutinik tigussaasunik allartitsisoqarsimansoq Naalakkersuisunut apeqqutigineqarpoq?

Akissut:

Ukioq manna Peqqissutsimut Naalakkersuisoqarfik aamma Peqqinnissaqarfik ilitsersuutinik - paasisitsiniutinik isiginnaagassianik arlalinnik suliarineqarnissaanut aallarniivoq, siunertaavorlu Peqqinnissaqarfimmut attaveqarnissamut periarfissat annertunerusumik ilisimasaqarfigineqalernissaat. Arfinilinnik ilitsersuutinik - paasisitsiniutinik imatut qulequtalinnik pilersaarutigineqarpoq:

- Katsorsarneqarnissat pillugu nalornissuteqarpit?
- Napparsimasunut siunnersortimik attaveqarneq.
- Allakkatigut naammagittaalliorsinnaaneq.
- Nunaqarfimmi najugaqaruit Peqqinnissaqarfimmut attaveqarneq.
- Illoqarfimmi najugaqaruit Peqqinnissaqarfimmut attaveqarneq.

Ilitsersuummik isiginnaagassiaq siulleq aasap ingerlanerani saqqummiunneqarpoq, isiginnaagassiallu tullii sananeqarput tulleriarlugillu saqqummiunneqartarumaarlutik. Isiginnaagassiat KNR-ikkut aamma inuit nittartakkatigut naapeqatigiittarfiatigut takutinneqartassapput. Isiginnaagassiat tamakkerlugit saqqummiunneqareeriarpata Peqqissutsimut Naalakkersuisoqarfik aamma Peqqinnissaqarfik paasisitsiniaaneq nalilersussavaat. Paasisitsiniaanermi Peqqinnissaqarfimmut attaveqarniarnermik ilisimasat siunertamut naammassinnittut nalilerneqarpata, Naalakkersuisut misissussavaat Peqqinnissaqarfik pillugu suli annerusumik ilitsersuummik - paasisitsiniummik isiginnaagassianik sanaqqissanersoq.

Tamanna ilutigalugu Naalakkersuisut peqqinnissaqarfimmi aqutsisut piomasaqarfigai suliniutini ingerlareersuni nutaanilu annerusumik innuttaasunik peqataatitsineq ilaatinneqarnissaa.

- "Atuisut Peqqinnissaqarfimmut tunngatillugu misigisartagaat" pillugu misissuineq inuiaqatigiinni kulturi naleqartitallu suleqatigiissutigalugit siunnersuisartoqarnissaanik assingusumik pilersitsinissamat tunngatillugu Naalakkersuisunit qanoq atorniarneqarpa?

Akissut:

Naalakkersuisut "Peqqinnissaqarfik atuisut isaannit isigalugu" nalunaarusiamit ilisimasat saqqummiunneqartut Peqqinnissaqarfimmi atorneqarsinnaasutut nalilerneqaraangata atorneqartarput. Atuisut misigisaat misilittagaallu Peqqinnissaqarfiup ineriartorneranut pingaaruteqarput. Oqaloqatigiinneq paasisutissiinerlu naatsorsuutitut assigiissaarinermut iluaqutaasinnaapput aamma peqqinnissaqarfitsinni sinaakkutit periarfissallu pillugit paaseqatigiilersitsisinnaavoq.

Maannakkoqqissaaq Peqqinnissaqarfik sulisoqarniarnikkut annertuumik unammillerneqarpoq, taamaattumillu nuna tamakkerlugu peqqinnissakkut sullissinerit qulakkeerumallugit pingaartumik ukkatarineqarpoq. Maannakkut inissisimaffik Naalakkersuisunit annertuumik eqqumaffigineqarpoq, taamaattumillu peqqinnissakkut sullissisut ulluinnarni allaffissornikkut suliakkerinissaat kissaatiginngilarput. Taamaattumik Naalakkersuisut maannakkut atuisut siunnersuisooqatigiivini taamaaqataanilluunniit pilersitsinissamik suliaqanngillat. Naalakkersuisut tunuarsimaarfiginngilaat kingusinnerusukku suleqatigiissitanik assigiinngitsunik atuisut oqaloqatiginerulernerannik siunertaqartunik pilersitsinissamik.

- Peqqinnissaqarfimmut saaffiginittarnerup aaqiivigineqarnissaanut periarfissat piusut Naalakkersuisunit ilisimaneqarnerulernissat qanoq sulissutiginiarneqarpa?

Akissut:

Apeqqut 1-imut akissut takuuk.

- Oqaatsip "atuisut siunnersuisooqatigiivi" paasinernerulersinneqarnissaa pisariaqartinneqarpoq, oqallinnermi tamatuma qanoq annertiginera tamatumalu pilersinneqarnissaanut aalajangiinissaq nalornissutigineqarmat. Atuisut siunnersuisooqatigiivi Naalakkersuisut qanoq nassuiarsinnaavaat? Siusinnerusukkut immikkut aningaasartuuteqanngikkaluarluni suliniummik assingusumik Peqqinnissaqarfik Avannaa suliniuteqarsimasoq ilisimaneqarmat.

Akissut:

Siunnersuisooqatigiit assigiinngitsunik iluseqarsinnaallutillu siunertaqarsinnaapput. Naalakkersuisut ilutsimik aalajangersimasumik aalajangiussaqaanngillat. Naalakkersuisuni upperinngilarput innuttaasunik peqataatsitsinerunissamat suleriuseq ataaseq peqqinnissaqarfinni tamani iluatsittumik atorneqarsinnaasoq. Tunngaviusumik Naalakkersuisuni isumaqarpugut, najukkami peqqissutsimut sulisorisat peqqinnissaqarfinni assigiinngitsuni aaqiissutissat sumiiffinni ataasiakkaani atorneqarsinnaasunik suliaqarsinnaajumaartut.

Med venlig hilsen
Inussiarnersumik inuulluaqqusillunga



Mimi Karlsen